

INUIT ATAQATIGIIT

INATSISARTUNI



5. august 2011

UKA 2011/58

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatsinni meeqqat atuarfianni ullumikkut meeqqat nalinginnaasumik atuartinneqarnissap saniatigut immikkut pisariaqartitsisut periarfissaat pillugit Naalakkersuisut nalunaarusioqqullugit peqquneqarnissaanik siunnersuut. Nalunaarusiornermi ersersinniarneqassapput, meeqqat qanoq amerlatigisut ullumikkut immikkut atuartinneqarnissaminnik pisariaqartitsisarnersut. Qanoq ukioqassutsimikkut inissisimanersut, sumi najugaqartuunersut (kommuni sorlermi), aammalu innarluutigisaat suunersoq. Tamatuma saniatigut nalunaarusiap ersersissavaa taakkunannga qanoq meeqqat amerlatigisut angerlarsimaffiup avataani isumaginninnikkut pissutsit tunngavigalugit inissinneqarsimanersut, taakkunanngalu ilaqutariinni imaluunniit ulloq unnuarlu angerlarsimaffinni qanoq amerlatigisut inissinneqarsimanersut. Ilanngullugu nalunaarusiami ersersinniarneqassaaq ukiuni qulini aggersuni taamatut inissinneqartartut, meeqqallu atuarfiini nalinginnaasumik neqeroortigineqartartut avataani atuartinneqartariaqartussat, qanoq amerlatiginissaat eqqoriarneqarsinnaanersut.

(Inatsisartunut ilaasortaq Debora Kleist, Inuit Ataqatigiit)

Tunngavilersuut:

Ullutsinni ilisimasaqarfiginerulersimavagut kikkut tarnikkut timikkullu arlaatigut innarluuteqartuunersut. Taamatut paasisimasaqarnerulersimanitta kingunerisaanik periarfissaqarnerulersippaatsigut meeqqat arlaatigut innarluutillit atuartinneqarnissaat pilersarusiussallugu, tamatumani anguniarlugu meeqqap atuarnermini annertunerpaamik pissarsiaqarsinnaanissaa.

Meeqqat arlaatigut timikkut tarnikkulluunniit nappaateqarteqaraluarlutik, taakkua ilaat meeqqat atuarfiini allatuulli atuartinneqarsinnaasarput. Kisiannili aamma meeraqarpoq imak innarluutigisaminnit sunnerneqartigisimasunik nalinginnaasumik atuartitsinerup avataani immikkut neqeroortigineqarnissaminnik pisariaqartitsisarlutik. Meeqqat tamakku klassini nalinginnaasuni imaluunniit atuarfinni immikkut atuartitsinikkut imaluunniit immikkut atuaqatigiinnngortinnerisigut imaassiinnarlugit ikiorseruminaassinnaasut nalorninartarluni. Taakkua ullup unnuallu ingerlanerani piffissani assigiinnngitsuni imaluunniit atuartitsinerup nalinginnaasup nalaani immikkut perorsaasunit paaqqutarineqarlutik immikkuullarissuni atuartinneqartariaqarsinnaasarput.

Ullutsinni suli angusimannngilarput naamaginantunik neqeroorteqarsinnaalluta immikkut atuartinneqartariaqartut pisariaqartitsinerat naamassiniarlugu. Kisiannili nalinginnaasumik meeqqat atuarfiini ukioqatiminnik atuaqateqarsinnaanngitsut, immikkut atuarfinni atuarnissamut neqeroortigineqarsinnaasariaqarput. Taakkunani periarfissat iluanni ineriartortinneqarsinnaanissaat anguniarneqarsinnaammat.

Tamakku tunngavigalugit kissaatigivara, meeqqat inuusuttuaqqallu ilinniartitaanissamut periarfissaasa pitsanngorsaavigineqassasut. Tamanna pitinnagu nalilersueqqissaartoqaqqaartariaqarpoq siullermik pissutsit qulaajaaviginerisigut, taavalu

tamanna tunngavigalugu siunissami pisariaqartitsisoqarnissaa eqqoriarlugu. Taamatut nalilersuinikkut periarfissineqassaagut innarluutilittagut pillugit paasissutissat tigussaasut tunngavigalugit oqallissinnaanissamut. Tamakku tunngavigalugit inatsisissatigut pisariaqartitat suliarineqassapput, ilaatigullu aamma aningaasaliissutit qanoq annertussuseqarnissaat qanorlu tulleriiarneqarnissaat aaqiivigineqarsinnaassagaluarlutik.

Tamatumani pisariaqarpoq immikkut isiginiassallutik, isumaginninnikkut pisariaqartitsinerat tunngavigalugu ulloq unnuarlu angerlarsimaffinnut meeqqat inissineqarsimasut timikkut tarnikkullu innarluuteqarsinnaanerit misissueqqissaarnissaq.

Oqaluuserilluartariaqarparput meeqqat taamatut sumiginnarneqarsimanertik pissutigalugu qanoq sulissuneqarluarsinnaanissaat, tassami innarluuteqarsinnaanerup saniatigut inuttut naapertuutinngitsumik paaqqutarineqarsimasimannginnertik anigorniartussaassinnaammassuk.

Pisortaqarfimmut aningaasaqarnikkut aqutsisoqarfikkullu sunniutit

Siunnersuut piareersarneqarnermini ukiup affaanik sivilissuseqarsinnaanissaa naatsorsuutigineqarpoq.

Inuussutissarsiuteqarfimmut il. il. aningaasaqarnikkut sunniutit

Sunniuteqannginnissaa naatsorsuutigineqarpoq.

Innuttaasunut aqutsisoqarfikkullu sunniutit

Sunniuteqannginnissaa naatsorsuutigineqarpoq.